

RIBA E CABEZ DI CLABO

Hija de la noche y Manuel Arabier tabata na San Nicolas

Mi a core rond cu un periodista – escritor argentino cu tabata di bishita na Aruba.

Despues di a drenta San Nicolas, nos a bay tuma algo di bebe na *Pitstop* y mi a cont'e cu esaki ta prome lugar cu mi a conoce como Shop di Chines ya cu mi mama tabata cliente fiel di eynan y cu e lugar tabata *Wong Wah*.

Mi a cuminza conta di e *Santana*, for di cual direccion nos a bini despues di a pasa parti pazuid biniendo for di Cura Cabay pazuid, e tereno di bala cu tabata conoci como *Heineken Field* y varios otro nomber cu el a haya den transcurso di añanan.

Pariba di e veld di bala tabata tin e arena di boxeo conoci como *Boxing Stadium* y cu e parti panort cu ta cay riba Bernhardstraat tabata fabrica di bacteria *Leon Battery* cu su dilanti supermercado di *Asing* chines.

Mi a hayami ta haci un recorrido den mi mente di e San Nicolas di e tempo ey, tratando di corda loke mi por corda ainda.

Di Leon bin ariba tabata haya cas di *Jose Dirksz*, y na otro banda e cas rose di dos piso di *Jonko Bislick*.

Den transcurso di aña a basha e cas aki abao tambe y algun aña despues, tambe e cas di *Isaac Canhai*.

Mi a sigui bay pariba y a yega unda a bira *Viana Auto Supply* cu mondi su tras cu a ser converti den garashi di Viana..

Esaki ta unda *WEMA* ta awe..

Ey nan tabata haya tambe cas di dos piso di tabla cu tabata di Viana.

Na parti pazuid a bin establece un otro garashi priva, y auto parts di un persona cu tabata conoci pa nos como *Autoparts di Jan Webo*...

E tabata bende santo tambe aki nan.

Dilanti dje, cu awe por bisa hasta patras di dje, a bin establece *La Princesa* cu pariba di dje *Victoria Bottling Company* cu su *Pepsi Cola*, *Kist y Grapette*.

La Princesa di Mario Croes a bay *B.v.d.Veen Zeppenfeldstaat*

Si bay poco mas pariba ta yega na e ski-

na unda tin *Gallo Rojo* y cu tabata skina di un di e cayanan mas popular di San Nicolas, pabao di *Warda di Polis*. Patras di warda di polis tabata tin un mercado, e *marshe* cu tabata e punto mas popular den San Nicolas, y un mercado cu nunca mas Aruba a mira un asina.

Tambe popular tabata *La Macorisana di Isaac De Cuba* cu tabata lugar popular pa bendemento di biyechi tambe. Pa tur fruta, verdura, carni, pisca etc. diariamente for di mainta tempran te atardi laat, e bida tabata den e marche aki patras di warda di polis.

Na su lugar a traha e post di *Brandweer San Nicolas*, despues.

Bo ta sali di mercado aki y bin haya oficina di *Doctor Dussenbroek*, *Fenix Bar*, *Botica San Lucas*, tambe panaderia *El Molino*, cu su dilanti den Bernhardstraat, *Canhai Store* y na otro banda di caminda e warda di polis.

Dilanti warda di polis tabata tin joyeria di *Mimi Marchena*.

Un edificio di tabla cu un veranda dilanti cu bo ta subi cu trapi di banda pariba of banda pabao.

Banda di dje tabata tin *Oriental Laundry*, unda a bini despues di hopi aña e *Domino's Pizza*.

Unda tin e *Burger King* tabata tin barak largo cu trahadornan caribense, y patras di Viana tambe tabata tin baraknan aki. Pabao di Misa tabata tin *Seamen's Club*..

Navegantenan cu tabata bini cu tankeronan tabata pasa nan oranan liber eynan.

Tin cu tabata pasa un periodo eynan debi na malesa, perdemento di tanker of di un of otro mala suerte,

Awe e lugar aki ta e popular *Teresita Center*.

Dilanti *Seamen's club*, nos tin ainda e pomp di gasoline cu tabata conoci como pomp di gasoline di Viana.

Pazuid di e pomp di gasoline unda awe tin *Central Madereinse* tabata *Tehuis di mariniernan*.

Ta sigui.